

# *CACCIA E PESCA*

## SAN NICOLA

Ogn'annu s'aspittava San Martinu  
pi farini dda solita cacciata  
'nto lagu 'i San Nicola di Mazara,  
lu regnu di Lentini e d'Avvocatù.

Quann'arrivava l'ura da' partenza  
'ntafarati cu armiggi e vittuvagghi,  
cu cutri, cu stivali, cu magghiuna  
e u cori 'nzasizzatu di litizza.

'Na vota ddà eramu i patrùna  
du lagu, du caiccu e di la stadda;  
u margiu nun avia nuddu sigretu  
e mancu u chianu, u voscu e la custerà.

Nun circavamu riti e mancu letti,  
(a stadda era pi nui lu megghiu albergu);  
mezzu la pagghia si stava comu Diu  
puru s'i surci eranu di casa.

Matina e sira ni mittiamu a posta  
e 'un c'era largu p'atri cacciatura;  
li vrazza dritti e li cartucci boni  
d'ogni vulata si facia stranera.

Dopp'a posta 'a matina si scia 'n chianu  
a caccia di calannari e addazzi;  
cu l'occasioni, certu, un si scurdava  
di cogghiri a vitdura e u pumadoru.

P'u menù c'era Bertu me' cucinu  
cocu di tant'anni sprimintatu;  
priparava certi pranzi, sull'onuri!  
N'alliccavamu puru li pignati!

E nun pinsati chi mancava u pisci,  
né si manciava u pisci di lu lagu:  
chè tra li scorti si purtava puru  
un panaru 'i ritunni sutta sali.

E cu' si po' scurdari i gran fuchiati  
avanti a stadda, a tagghiu di lu lagu,  
unni lu focu a un tempu ni sirvia  
p'arrustiri i ritunni, e... lu bucatu?

'Na vota tantu si niscia pi funci  
(funci di fella, di chiddi a panaru).  
Pinu Lentini era addettu o focu  
cu 'na rarigghia chi paria 'n tappitu.

Cola Avvocatu, aceddu chiù chi omu,  
cu dda coppula vecchia e 'ntartarata,  
era 'ngaggiatu pi tutta la simana  
com'omu tuttu fari a tempu chinu.

Appena si sintia orchi richiamu  
d'aceddu chi passava 'nte paraggi,  
Cola friscava c'a stessa chiamata  
e l'aceddu... era già dintra a pignata.

Nun mancavanu i soliti 'mprevisti:  
'n'affunnata traditura nta lu margiu!  
Rigina ' chi si futti li vasteddi!  
Un surci chi s'abbenta com'un gattu!

A sira, certu, dopu la manciata,  
i vecchi fissarii di cacciatura:  
cani 'nfatati! scupittati... 'n celu!  
aceddi chi cadinu a mazzuna!

Di poi: s'armava u solitu trissetti;  
a tazza di café pi cunciliari;  
a cunzata... du fenu, p'a nuttata;  
a vistuta di Totò... cu lu pigiama!

E d'accussì vulava la simana  
e juncia u mumentu da partenza:  
N'accughiamu l'armiggi, i rimanenzi,  
i pennuli d'aceddi... 'Na vasata e...

...'N'atr'annu, a San Martinu!

---

<sup>1</sup> *la cagna.*

## 'DDA PISCATA

Stamatina circava 'nt'on casciumi  
un certu documentu da' me' casa  
quannu... vardannu tra li carti  
mi veni 'n manu 'na fotu d'atri tempi.

Semu a la Firmicula: iu, Spartacu,  
me' frati Micheli, Più Amaru,  
Pippu e Petru D'Asculi...  
e 'na carriola tomita di pisci.

E la menti mi porta a dda jurnata! :  
Sarpamu di Trapani a sett'arbi  
(è 'na matina d'austu, u mari è ogghiu)  
e n'assurgemu o' largu da' Firmicula.

Semu armati di soliti fucili  
(cui a modda e cui a elasticu)  
e di 'na para respiraturi a ossiginu.  
Ferru filatu o' cintu... e ni jttamu.

U tempu di tuccari l'acqua,  
d'assistimarimi; taliu u funnu...  
e viu un Petru D'Asculi chiù nicu  
chi spara, mi pari, un lappaneddu.

M'abbuddu puru iu...  
ddu lappaneddu è 'na cirniotta di du' chila.  
(semu a quinnici metri sott'o mari  
e di dda supra tuttu pari nicu).

E 'ntantu viu chi 'n esercitu di sarpi  
mi gira 'ntornu a tipu cuntradanza;  
sunnu all'incirca un cintinaru  
e mi talianu a tipu pisci strammu.

Mi fermu, assapuru 'stu tiatru;  
poi cercu lu pisci lu chiù grossu,  
ci sparuru... e lu spirtusu.  
Ricarricu, sparuru; 'n'atru pisci.

Ora l'amici 'un sunnu chiù curiosi;  
caperu a sorfa e s'a squagghiaru.  
Petru è chiù luntanu; u viu sparari.  
M'avvicinu... 'na cernia ch'e un bistuni.

Assummamu pi pusari lu piscatu;  
ed eccu Pippu; s'arricampa all'usu so':  
'na cirniotta ed atri pisci o' cintu  
e 'na cernia, 'nfilata ancora o' ferru.

Aspettu occhi minutu...  
Micheli nata versu di la varca  
cu Spartacu chi veni pì d'appressu:  
hannu un ferru filatu chinu 'i pisci.

Mancu u tempu di scinniri da' varca...  
Amaru dici chi c'è Pippu  
chi chiama rinforzi; fa segnali.  
Chi successi? Un runcu ci stuccau l'arpiuni!

Ni jttamu arrè a lu funnu tutti quanti...  
Quannu finisci la piscata  
avemu 'na sessantina chila 'i pisci.  
Scinnemu 'n terra a la Firmicula.

I tunnaroti ni vardanu alluccuti!  
Pigghiamu 'na carriola; caricamu;...  
e chissa è la futografia di lu riordu.  
Ma lu sapiti... chi rifici dda piscata!



## CACCIATA A LA FRIDDA

Chi beddi tempi! Chi bedda giovintù!  
Ogni matina, a tempi 'i nivalori  
quannu u celu prumetti timpurali,  
fora du lettu 'e quattro di matina!

Stivali a coscia e cappeddu 'i salinara,  
magghiuna e poi magghiuna e poi 'ncirata,  
(appuntamento fissu 'o Canaleddu)  
e partenza 'i volontari versu a fridda.

Cu eranu 'sti foddì scatinati?  
Iu, Totò, Pippu D'Asculi bon'arma,  
e poi Guaiana, Ferru ed a li voti  
c'era puru Millocca cu Bertini.

Nun vi dicu li sceni du trasbordù!  
p'arrivari a lu vasu di la fridda  
c'era d'attravirsari un pezzu 'i portu  
e n'apocu di canali e canaleddi.

Quann'era tempu bonu 'un c'era storia;  
ma 'nveci s'era tempu di timpesta  
a travirsata unn'era cosa duci.  
Millocca poi, pi casanza di la 'amma

si scantava chi s'a varca s'abbuccava  
a 'amma 'i lignu lu mannava 'n funnu.  
E 'ddi matini facia comu 'na fera  
vuciannu: picciotti, stamu attenti,

'n vogghiu finiri 'n funnu di lu mari!  
'N casa haiu figghi e haiu mughieri!  
Marannuzza, sarvatimi la peddi!  
Finalmenti quannu s'arrivava

ognunu s'abbiava a la so' posta,  
avarava la cascia cu li stampi  
e si facia a solita passata  
p'assistimari papari e zimmeddi.

A la fini ognunu 'nta so' fossa  
cu l'occhi e cu l'aricchi sbarrachiati.  
S'era matina 'i passa ed era un preu:  
ancora o' scuru si sintia la caccia

chi si pusava dintra di la fridda.  
Pippu, chi chiamavamu «a buttana»  
pi via chi facia la paparedda,  
si scatinava comu un ciurriviu

cuminciannu a cantari a vuci rutta:  
quà quà quà quà e 'nta lu mentri  
friscava cu lu chiamu du friscuni.  
Certu, di l'atri banni 'un s'era muti

e l'aria risunava di richiami.  
A la chiamata a caccia s'abbulava  
e si pusava 'n mezzu li zimmeddi.  
Niatri, tutti muti e abbaffati,

puru s'a caccia era veru 'n vucca  
aspittavamu un pocu di chiaria  
pi putiri sparari tutti pari.  
A lu mumentu giustu, era 'na verra!

'Na pocu li mitiamu pusati,  
atri chi s'abbulavanu carianu,  
chiddi chi si sarvavanu 'i 'na banna  
'n'avianu scampu cu l'autri scupittati.

E 'ntantu atri papari arrivavanu  
e a li scupetti ci quariava a canna.  
Finuta a verra s'accughia la caccia:  
palacciuna, quattr'occhi, coddi viridi,

e poi friscuna, pavuna, papardeddi...  
Versu i setti la passa si carnava  
e si mittia quarcosa sutta i denti.  
'Nta me' posta c'era di prammatica

pani, furmaggiu, salaminu, nuci...  
Paulu Guaiana, 'ntisu «lu cinisi»  
pi la casanza chi ci assimigghiava,  
nun disdignava manciari li fasoli.

Fasoli a li setti, mi sintiti?  
Poi s'era jornu 'i festa s'arristava,  
speci si la jornata prumittia;  
'nveci s'era jornu di simana

s'accughianu stampi ed amminniculi,  
s'assistimava a posta c'u cuvecchiu,  
e s'addrizzava a prua p'u Canaleddu  
pi ghirininni ognunu 'o so' travagghiu.